

16/12/2000

PM nafi lancar `Ops Lalang`

Zulkofli Jamaludin

SERDANG, Jumaat - Datuk Seri Dr Mahathir Mohamad hari ini menyangkal khabar angin kononnya kerajaan akan melancarkan satu operasi sama seperti `Ops Lalang` pada 1987, untuk menahan pemimpin pembangkang mengikut Akta Keselamatan Dalam Negeri (ISA).

"Saya tidak tahu apa-apa. Mungkin pembangkang lebih tahu daripada saya atau mereka berasa bersalah.

"Mereka tahu apa yang mereka lakukan adalah salah dan bimbang kerajaan mungkin mengambil tindakan terhadap mereka," kata Perdana Menteri mengulas sama ada kerajaan menimbang mengambil tindakan terhadap pemimpin pembangkang.

Bercakap kepada pemberita selepas menyampaikan pensijilan MS ISO 9001 kepada Fakulti Perubatan Veterinar Universiti Putra Malaysia (UPM) di sini, beliau berkata, keadaan politik sekarang tidak mewajarkan tindakan sedemikian.

Bagaimanapun, katanya, jika pembangkang memaksa kerajaan serta didapati mereka tidak menghormati undang-undang dan ketenteraman, kerajaan mungkin terpaksa melakukan sesuatu mengenainya.

"Anggapan mereka ialah jika berdemonstrasi dengan berkumpul berpuluh ribu orang, polis tidak akan berupaya bertindak dan jika ditahan mereka semua akan berkata mereka berada di situ secara kebetulan.

"Ini yang mereka selalu katakan tetapi tujuan sebenarnya tentulah untuk mencuba mengganggu pentadbiran kerajaan," katanya.

Selasa lalu, Timbalan Perdana Menteri, Datuk Seri Abdullah Ahmad Badawi, berkata kerajaan tidak akan menggunakan ISA menggunakan akta itu sewenang-wenang untuk membanteras perhimpunan haram.

Bagaimanapun, Abdullah yang juga Menteri Dalam Negeri berkata, polis akan bertindak tegas mengikut undang-undang kerana tidak ada kompromi dalam asoal keselamatan.

Operasi Lalang 1987 menyaksikan penangkapan beberapa pemimpin pembangkang, termasuk bekas Ketua Pembangkang Lim Kit Siang dan Ahli Parlimen Kuala Kedah, Mohamad Sabu, mengikut Akta Keselamatan Dalam Negeri (ISA).

Dr Mahathir berkata, fenomena cuba mengganggu kelancaran pentadbiran kerajaan berlaku di negara membangun sedangkan di negara maju, kempen menentang kerajaan berhenti selepas pilihan raya.

"Di negara membangun, yang kalah dalam pilihan raya akan cuba menjatuhkan kerajaan (yang dipilih) melalui demonstrasi dan rusuhan tetapi mereka lupa bahawa jika mereka membentuk kerajaan, mereka juga akan menghadapi keadaan yang sama," katanya.

Perdana Menteri berkata, negara membangun yang mempunyai kerajaan yang dipilih secara demokratik tidaklah begitu stabil.

Bagaimanapun, katanya, di Malaysia kebanyakan rakyat Malaysia adalah orang yang berakal tetapi ada sesetengah orang masih tidak belajar mengenai etika demokrasi.

Mengenai tuntutan 100 perkara yang dibuat Gabungan Pelajar Melayu Semenanjung (GPMS), Dr Mahathir berkata permintaan itu dibuat sebagai tidak balas kepada tuntutan Jawatankuasa Rayuan Pilihan Raya Persatuan-persatuan Cina Malaysia (Suqiu).

Suqiu sebelum pilihan raya umum 1999 membuat tuntutan 83 perkara kepada kerajaan termasuk meminta hak sama rata daripada kerajaan dari segi peluang perniagaan bagi semua kaum di negara ini.

"Tuntutan GPMS supaya Perdana Menteri mestilah orang Melayu saja...saya rasa ia ada tindak balas terus terhadap tuntutan yang dibuat oleh satu lagi pihak (Suqiu)," katanya.

Dr Mahathir berkata selama 43 tahun, rakyat Malaysia bekerja keras untuk menyatukan semua bangsa dan kita mencapai satu tahap keharmonian yang tidak pernah ditemui di mana-mana negara berbilang kaum lain.

"Tetapi kumpulan kecil ini berkeras untuk menuntut perkara semata-mata untuk mereka dan dalam berbuat demikian mereka memprovokasi orang lain untuk membuat tuntutan yang lain," katanya.

Ditanya sama ada beliau akan meminta GPMS berhenti daripada membuat tuntutan, beliau berkata:

"Jawapan mereka tentunya kenapa Datuk Seri tidak meminta mereka (Suqiu) berhenti dulu...Saya tidak suka semua ini ... sebenarnya kedua-dua pihak patut berhenti."

(END)